



**ORDENANZA Nº 39 DE BOAS PRÁCTICAS VECIÑAIS E SEGURANZA CIDADÁ DO
ILMO. CONCELLO DE XINZO DE LIMIA**

BOP 04/06/2009

INDICE

EXPOSICIÓN DE MOTIVOS

TÍTULO PRIMEIRO

TÍTULO SEGUNDO: DEREITOS E DEBERES DA POBOACIÓN

Capítulo 1º: Dos dereitos cidadáns.

Capítulo 2º: Dos deberes dos habitantes de Xinzó de Limia.

TÍTULO TERCEIRO: DA POLICIA DA VIA PÚBLICA

Capítulo 1º: Disposicións xerais.

Capítulo 2º: Rotulación e numeración.

Capítulo 3º: Animais domésticos.

Capítulo 4º: Limpeza da vía pública e recollida de residuos.

Capítulo 5º: Uso especial da vía pública.

Capítulo 6º: Publicidade na vía pública.

Capítulo 7º: Ocupación da vía pública con postos ou quioscos e venda ambulante.

Capítulo 8º: Do tránsito pola vía pública con elementos ofensivos ou perigosos.

Capítulo 9º: Do uso impropio e indebido da vía pública.

Capítulo 10º: Dos actos vandálicos no uso do mobiliario urbano.

Capítulo 11º: Dos actos de mendicidade e prestación de determinados servizos na vía pública.

TÍTULO CUARTO: POLICÍA DA VIA PÚBLICA, EDIFICIOS, CONSTRUCIÓN E SOARES.

TÍTULO QUINTO: DO PROCEDIMENTO SANCIONADOR

Capítulo 1º: Disposicións xerais.

Capítulo 2º: Réxime sancionador.

Capítulo 3º: Reparación de danos.

Capítulo 4º: Medidas de policía administrativa.

DISPOSICIÓN ADICIONAL

DISPOSICIÓN DERROGATORIA



DISPOSICIÓN FINAIS

EXPOSICIÓN DE MOTIVOS

O Ilmo. Concello de Xinzo de Limia, coa Ordenanza de Policía, Bo Goberno e Convivencia, establece un marco que garanta a convivencia cidadá definindo as normas ás que a mesma ha de axustarse, e iso para facer efectivos os dereitos veciñais emanados dos principios constitucionais do art. 18 e concordantes da Lei 7/1985, do 2 de abril, de Bases de Réxime Local e do resto do ordenamento xurídico. Dítase en uso da potestade de Ordenanza que teñen atribuída as Corporación polo art. 140 da Constitución, 84.1 e Título XI da Lei 7/1985 e 55 do seu Texto Refundido, así como na Carta Europea de Salvagarda dos Dereitos Humanos.

Para conseguir ese obxectivo, a ordenanza establece dereitos e deberes dos veciños nas súas relacións mutuas, así como nas súas relacións co Concello, co obxectivo de puntualizar aqueles aspectos que, non estando expresamente regulados en normas de igual ou superior rango, contribúen a mellorar as relacións no ámbito do termo municipal.

A Ordenanza configúrase dentro dos límites que establecen a Constitución Española, o Estatuto de Autonomía de Galicia, e as demais leis, estatais ou autonómicas, que configuran o marco de actuación das entidades locais.

Todas as materias que se regulan nesta Ordenanza enténdense sen prexuízo das demais normas reguladoras das materias ás que se refire a mesma, que serán de aplicación preferente salvo no que nelas non estea expresamente determinado.

TÍTULO PRIMEIRO

Artigo 1. - *O obxectivo primordial da Ordenanza é o respecto e a mellora da convivencia cidadá e o fomento do civismo, o respecto entre as persoas e ao medio e, no seu caso, establecer as medidas precisas para corrixir as situacións que as perturben e aplicar as sancións que procedan.*

Artigo 2. - *A Ordenanza é de aplicación en todo o termo municipal de Xinzo de Limia, e quedan obrigados ao seu cumprimento os que se atopen nel, sexa cal fose a súa condición veciñal e estean ou non censados no Municipio.*

TÍTULO SEGUNDO: DEREITOS E DEBERES DA POBOACIÓN

Artigo 3. - *Recoñécese a todos os veciños do Municipio, con independencia dos dereitos que xenericamente lles recoñecen a Constitución e as leis, o dereito ao uso e goce de todos os servizos municipais en condicións de igualdade de acordo coas normas, ordenanzas e regulamentos que os rexen. Ás persoas que se atopen no termo municipal e non teñan a condición de veciños, recoñeceránselles todos os dereitos que non sexan inherentes a esta.*



Capítulo 1º: Dereitos dos cidadáns

Artigo 4. - *Recoñécense os veciños de Xinzo de Limia, e aos que se atopen eventualmente no termo municipal nos termos previstos nas leis, os seguintes dereitos:*

- a) Protección da súa persoa e os seus bens.*
- b) Dirixir instancias e peticións á Alcaldía e á Corporación Municipal.*
- c) Solicitar aproveitamentos especiais sobre bens de uso público e prestación de servizos en interese exclusivo de parte.*
- d) Participar na xestión municipal, de acordo co disposto na lexislación vixente.*
- e) Ser elector e elixible, de acordo co disposto na lexislación vixente.*
- f) Aqueles outros dereitos establecidos polo Ordenamento Xurídico Español.*
- g) Respecto dos demais dereitos cidadáns de liberdade, seguridade, tranquilidade, salubridade e goce dun medio axeitado e digno.*

Capítulo 2º: Dos deberes dos habitantes de Xinzo de Limia.

Artigo 5. - *Todos os habitantes de Xinzo de Limia están obrigados:*

- a) A cumprir as normas e regulamentos ditados coas debidas formalidades polos órganos da Administración.*
- b) Comparecer, por si ou mediante representante debidamente acreditado, ante a Autoridade Municipal cando fosen emprazados para o cumprimento dalgún trámite ou deber persoalísimo.*
- c) Comunicar o seu domicilio e subministrar os datos estatísticos que lles fosen solicitados e achegar os documentos que lles fosen requiridos para cumprir expedientes municipais ou para atender requirimentos doutros órganos.*
- d) A satisfacer con puntualidade as exaccións municipais que lles afecten, impostos, prezos especiais, taxas, contribucións especiais e demais cargas na forma e condicións previstas pola lexislación vixente.*
- e) Recibir a prestación dos servizos municipais de carácter obrigatorio no Municipio, na forma e cos requisitos que establecen as Ordenanzas municipais ou os Regulamentos reguladores do servizo.*
- f) Prestar a necesaria colaboración para o cumprimento das normas cívicas e de convivencia cidadá.*
- g) Respetar as normas de utilización das vías, espazos públicos e medio natural así como os bens e os servizos públicos, conforme ao destino que lle é propio.*
- h) Respetar as normas cívicas e regras de mutuo respecto, en interese da convivencia cidadá.*
- i) Respetar a todas as persoas no pacífico exercicio dos seus dereitos e conviccións.*
- j) Evitar actitudes, condutas ou expresións, individuais ou colectivas, que poidan afectar á dignidade das demais persoas, con especial atención no caso de menores, anciáns ou persoas afectadas por algún tipo de minusvalidez.*



Artigo 6. - O Concello, dentro dos límites das súas competencias e dos medios ao seu alcance, procurará atender e auxiliar as persoas desvalidas que, previa a acreditación das súas circunstancias, soliciten axuda de subsistencia ou sanitaria, xa se atopen no termo municipal de forma temporal ou permanente. Para tal efecto poderán concederse socorro a aqueles transeúntes que xustifiquen tal necesidade ao seu paso polo municipio.

TÍTULO TERCEIRO: DA POLICÍA DA VÍA PÚBLICA

Capítulo 1º: Disposicións xerais.

Artigo 7. - O servizo de vixilancia, información e seguridade das persoas e bens está encomendado á Policía Local, que actuará cumprindo as ordes e instrucións de servizo, así como tamén por iniciativa propia nos casos e na forma que establecen a normativa reguladora das súas funcións e especialmente para vixiar o cumprimento das leis, regulamentos e Ordenanzas municipais.

Os axentes, por conduto dos seus xefes e para coñecemento da autoridade municipal, transmitirán á Alcaldía partes detallados dos feitos en que interviñeran así como da información que obtiveren ou lles fose requirida polos servizos e dependencias municipais para o cumprimento de trámites.

Artigo 8. - O Concello poderá nomear outro tipo de persoal que, non pertencendo ao equipo da Policía Local, poidan realizar tarefas que non sexan da competencia exclusiva da mesma por non implicar exercicio de autoridade, tales como supervisión de anomalías no viario, infraestrutura, servizos ou mobiliario urbano, ordenación dos accesos aos centros docentes, colaboración no desenvolvemento de celebración ou actividades privadas na vía pública, información cidadá, inspección de tributos ou urbanística, notificacións, información que afecte ao mantemento axeitado de bens e servizos municipais. O devandito persoal, baixo a denominación de vixilantes do ámbito, informadores municipais, notificadores, inspectores ou similares terá tamén encomendada a tarefa de informar sobre calquera incumprimento desta Ordenanza.

Artigo 9. - Prohíbese a actividade de control ou vixilancia particular de aparcamento de vehículos nas vías públicas e espazos públicos sen autorización do Concello. As persoas que realicen tarefas de axuda aos condutores con motivo da realización de obras ou de información sobre espazos libres para aparcamento na vía pública deberán acreditarse previamente ante o Concello para os efectos de control administrativo.

Artigo 10. - Todos os habitantes do Municipio, como principais interesados no respecto aos bens e servizos públicos e na súa utilización de forma acorde coa súa natureza, deberán colaborar coas autoridades municipais denunciando as infraccións da presente Ordenanza.

Artigo 11. - Prohíbese alterar a orde e a tranquilidade pública con rifas, escándalos, berros ou ruídos que excedan do límite de tolerancia establecidos na normativa



CONCELLO DE XINZO DE LÍMIA (Ourense)

Código Postal 32630 - Tel. 988 55 01 11 - Fax. 988 55 01 12 - C.I.F. P 3203300 C

reguladora. Inclúense dentro desta prohibición os ruídos producidos nas vivendas e locais ou na vía pública, ou perceptibles dende ela, derivados de calquera actividade ou traballo que se realice, ou polo uso de elementos mecánicos ou maquinaria de todo tipo, circulación de vehículos, motocicletas ou ciclomotores, instrumentos musicais e aparatos reprodutores de son, mesmo os situados en vehículos estacionados ou en marcha dotados de equipos musicais ou con sistemas de megafonía de calquera clase. As excepcións por razón de festas, bailes e festexos populares, serán autorizadas, no seu caso, pola Alcaldía logo de petición por escrito dos interesados.

Así mesmo queda prohibido molestar os veciños con emanacións de fumes, olores e gases prexudiciais ou simplemente molestos.

As infraccións que se produzan nesta materia consideraranse leves, graves ou moi graves, segundo a incidencia que produzan de conformidade cos arts. 139 e seguintes da Lei 7/1985, do 2 de abril, de Bases de Réxime Local. As infraccións sancionaranse segundo a súa clasificación do seguinte modo: infraccións moi graves: multa de 1501 a 3.000 euros, infraccións graves: multa de 751 a 1500 euros e infraccións leves: multa de 100 a 750 euros.

Sen prexuízo da sanción que puidese corresponder, en caso de reincidencia poderase proceder ao precinto ou comiso dos elementos causantes das molestias, en tanto se ofrecen polo infractor as garantías ou compromisos que aseguren que porán os medios precisos para que os feitos denunciados non se volvan repetir.

Artigo 12. - *Considerarase vía pública aos efectos de aplicación deste título, calquera espazo urbanizado de uso común e pública concorrencia do termo municipal, tales como as estradas, travesías, camiños, avenidas, rúas, prazas, parques, xardíns, e outros análogos do termo municipal.*

Esténdese a aplicación do concepto anterior ás pasaxes particulares, plataformas ferroviarias ou doutros transportes públicos e vehículos públicos de superficie, e tamén aos espazos cubertos do termo municipal con servidume de paso de persoas e vehículos.

Igualmente consideraranse vía pública aqueles outros espazos, construcións, instalacións, vehículos ou elementos que estean destinados a un uso ou a un servizo público de titularidade da Administración ou de calquera outra entidade ou empresa, pública ou privada, como vehículos de transporte; marquesiñas, paradas de autobuses, de ferrocarril, ou de autocar.

Por último tamén no tratamento desta materia se asimilarán á vía pública, aos efectos desta Ordenanza, os espazos, construcións, instalacións e bens de titularidade privada cando dende eles se poidan realizar actividades que afecten de xeito negativo aos cidadáns ou aos espazos, instalacións e elementos sinalados nos apartados anteriores, ben con motivo do seu uso ou por descoido ou falta de axeitado mantemento dos mesmo por parte dos seus propietarios, arrendatarios ou usuarios.



Capítulo 2º: Rotulación e numeración

Artigo 13. - *Todos os edificios situados en vías urbanas deberán mostrar a placa indicadora do número que lles corresponda e os localizados na confluencia de vías urbanas quedarán suxeitos á servidume de rotulado das rúas e os seus ocupantes deixarán libre de impedimentos a perfecta visibilidade daquelas.*

Artigo 14. - *Os propietarios de terreos ou inmobles están obrigados a permitir a instalación en fachadas, enreixados ou valla da súa propiedade, tanto de rótulos de denominación da vía como de sinais de circulación ou informativas, elementos de iluminación pública, telefonía, gas, electricidade ou calquera outras instalacións de servizo público, respectar a súa permanencia, repoñelos ao seu cargo nas súas mesmas condicións en caso de execución de obras particulares que lles afecten, e previos os correspondentes permisos e licenza municipal con constitución de fianza abonda, así como a facilitar as tarefas que fose preciso realizar para o seu mantemento ou substitución.*

Esta obriga é de interese xeral, afecta a todas as propiedades do termo municipal e é gratuíta dado que non supón limitación ningunha do seu uso ou goce, sen prexuízo da súa previa notificación cando proceda. O seu incumprimento considérase infracción leve sancionable con multa de 300 euros.

Artigo 15. - *Os promotores das actuacións urbanísticas que dean lugar á apertura de rúas están obrigados a efectuar á súa costa a súa rotulación e numeración dos seus inmobles na forma que o Concello determine e con suxeición aos mesmos criterios estéticos de rotulación do viario do resto do Municipio.*

Igualmente, os propietarios dos inmobles están obrigados a colocar ou manter a numeración identificativa de cada inmovible e á súa substitución cando se modifique a súa orde. Se non se cumprixe a indicada obriga, procederase á súa colocación polo Concello, sendo os gastos a cargo do promotor ou propietario do edificio, independentemente da sanción que puidese corresponder por incumprimento da Ordenanza.

Artigo 16. - *A execución de obras necesarias para a perfecta conservación dos elementos estruturais e ornamentais dos espazos públicos é competencia do Concello. Non obstante, as obras de conservación e mantemento das zonas comúns de urbanizacións privadas ou non recibidas polo Concello, serán exclusivamente a cargo dos seus propietarios ou promotores.*

Artículo 17. - *Corresponde igualmente aos propietarios inmobiliarios a execución das obras de conservación, reparación e ornato público das fachadas dos seus inmobles, accesos, pasaxes e cerramentos, así como a construción, reparación e limpeza das beirarrúas que os limitan, coas características e previas as autorizacións preceptivas.*

Capítulo 3º: Animais domésticos



Artigo 18. - *A tenza e posesión de animais de compañía en domicilios particulares e en zonas residenciais acomodarse ao previsto nas normas regulamentarias e Ordenanzas Municipais, e será autorizable sempre que polo seu número ou as súas características non provoquen no ámbito molestias, perigo ou afeccións á hixiene e salubridade ambiental.*

Artigo 19. - *O Concello procurará dispoñer dun servizo de eliminación de animais domésticos mortos, que deberán ser entregados no lugar que se determine. O referido servizo abonarase polo usuario conforme ao previsto na Ordenanza municipal de aplicación.*

Capítulo 4º: Limpeza da vía pública e recollida de residuos

Artigo 20. - *O Concello terá establecido un servizo municipal encargado da limpeza dos espazos públicos, sen prexuízo da obriga dos veciños de adoptar as medidas precisas para non orixinar sucidade nela así como eliminar a que causen, voluntaria ou involuntariamente.*

Artigo 21. - *A limpeza pública practicarase dentro do horario e programación establecida polo Ilmo. Concello e cos medios manuais, técnicos e vehículos axeitados para iso.*

Artigo 22. - *Os residuos domésticos, orgánicos ou degradables e non líquidos serán depositados en bolsas hermeticamente pechadas que introducirá o usuario dentro do colector máis próximo ao seu domicilio nunca antes das 20:00 horas nin despois das 07:00 horas. De estar o colector totalmente saturado depositaranse no colector máis próximo.*

Os demais residuos non degradables, tales como envases de vidro, envases lixeiros, papeis e cartóns depositaranse nos colectores especificamente destinados a cada material. No caso dos establecementos adheridos ao sistema de recollida porta a porta de papel-cartón, aqueles pódense acopiar xunto aos contenedores ou na porta do establecemento, sen molestar o tránsito peonil ou rodado e nunca antes das 20:00 horas nin despois das 21:00 horas.

Está prohibido o desprazamento dos colectores do lugar asignado pola Administración Municipal. Tampouco se permite o estacionamento de vehículos en lugares que dificulten ou impidan o traslado dos mesmos ou as labores de carga e descarga.

Os servizos municipais, directa ou indirectamente poderán organizar a recollida de animais mortos na vía pública, e a recollida de voluminosos (móbeis, útiles, electrodomésticos) e refugallos de obras menores domiciliarias. Agás no primeiro caso, os usuarios optarán por solicitar o servizo, previa cita e contra a taxa correspondente, ou levar directamente os residuos voluminosos e/ou refugallos ao punto limpo, en horario de servizo, sito no parque empresarial, onde lle serán recibidos sen custo. En calquera caso queda prohibida a súa acumulación e depósito na vía pública (agás autorización previa) nin nos contenedores de lixo de calquera tipo.



O Servizo Municipal non comprenderá en ningún caso a reiterada de residuos producidos polas seguintes actividades: industriais non asimilables a residuos sólidos urbanos, de construción que excedan das menores domiciliarias, agrícolas e gandeiras, os que deban ser depositados en vertedoiros especiais, residuos hospitalarios bioperigosos.

Queda terminantemente prohibido botar residuos, aceites, graxas, produtos inflamables e análogos á vía pública ou á rede municipal de saneamento a través da rede de sumidoiros, debendo ser entregados para a súa reciclaxe.

Artigo 23. - *O cumprimento da obriga de respectar estas normas de limpeza e hixiene, que leva consigo a de manter limpa a beirarrúa existente en fachadas dos edificios, soares e obras, zonas comúns das urbanizacións, vías privadas, soares e zonas axardinadas destes, esixirase na forma seguinte:*

- a) Vivendas, soares e Urbanizacións: O propietario ou propietarios, solidariamente. Nas vivendas constituídas en réxime de propiedade horizontal, o Presidente da Comunidade ou persoa representativa desta. Nas Urbanizacións, o Presidente da entidade urbanística de conservación ou da Comunidade de Propietarios e onde esta non exista, os propietarios solidariamente.*
- b) Nos edificios industriais, o seu titular ou o seu representante legal.*
- c) Nos edificios públicos, Centros de Ensino, culturais, sanitarios, deportivos, administrativos, relixiosos, etc., o titular do seu órgano directivo.*
- d) Nos edificios en construción, o promotor e o contratista, solidariamente.*

Artigo 24. - *Os titulares de inmobles ou actividades en cuxo interese ou servizo se realicen obras ou operacións de transporte, carga e descarga, así como as empresas ou persoas físicas que realicen as devanditas operacións, deberán limpar sen necesidade de previo requirimento, e cantas veces sexa necesario, a sucidade ou verteduras que ocasionasen tanto nas beirarrúas coma na vía pública.*

O Concello, logo de requirimento ao responsable de obriga anterior, poderá realizar as tarefas de limpeza con cargo a este, sen prexuízo das sancións que polo incumprimento lle puidesen ser impostas, segundo a gravidade da infracción. En todo caso, na execución destas actividades cumprirase o disposto na Ordenanza Municipal de Circulación e os horarios e espazos de carga e descarga fixados polas normas ou polo Concello.

Artigo 25. - *Os titulares de establecementos comerciais de todo tipo e en particular os que se dedican á venda de artigos, sexan alimenticios ou doutro tipo, que producen residuos ou sucidade ou estean provistos de envoltorios, tales como os postos ambulantes e quioscos, e en xeral os responsables de calquera actividade que afecte á vía pública quedan obrigados, nos termos sinalados polo Concello, a instalar a súa costa papeleiras ou recipientes apropiados en sitio visible da actividade e do seu ámbito, ao obxecto de que se manteña sempre a limpeza e non se bote lixo á vía pública.*



Artigo 26. - *Os propietarios de terreos e soares deberán dedicalos ao uso que lles é propio a teor do plan urbanístico e mentres tanto, quedan obrigados a mantelos limpos de maleza, en evitación do risco de incendio, así como de lixos de todo tipo, e debidamente valados na forma e coas características previstas nas Ordenanzas de aplicación. Así mesmo deberán realizar as operacións fitosanitarias, de desratización e desinfección que sexan necesarios para garantir unha axeitada salubridade nestes.*

Igualmente e de tratarse de zonas verdes estas deberán estar sempre en estado axeitado de limpeza e libres de maleza e debidamente podadas para evitar infeccións, pragas, enfermidades, risco de incendio ou caída de ramas.

O Concello, logo de requirimento ao propietario incumpridor, poderá adoptar as medidas precisas para a observancia desta obriga con cargo ao propietario e sen prexuízo das sancións e demais medidas que procedan.

Artigo 27. - *Queda expresamente prohibido efectuar na vía pública e espazos de uso común, públicos ou privados, os seguintes actos:*

a) Lanzar, verquer ou depositar lixos, augas, líquidos, terras, entullos, detrito, botellas ou recipientes doutro tipo así como papeis ou desperdicios de calquera clase, tanto nos espazos públicos ou comunitarios como nos privados.

b) Efectuar pintadas escritas inscricións e grafismos ou colocación de publicidade no mobiliario urbano, fachadas de edificios, paredes, muros, cerramentos de soares e, en xeral, en calquera espazo do termo municipal visible dende a vía pública incluídas calzadas, beirarrúas, árbores, reixas permanentes ou provisionais, farois e sinais, instalacións en xeral e vehículos municipais, sen contar coa preceptiva autorización municipal por escrito. Responderán diso os autores e, solidariamente, os beneficiarios ou organizadores da actividade publicitaria. A autorización, no seu caso, levará consigo a obriga do interesado para eliminar á súa costa o elemento autorizado no prazo que se lle indique.

c) Cuspir ou realizar necesidades fisiolóxicas.

d) Lavar ou baldear vehículos e realizar operacións de reparación ou cambio de aceite ou pezas do vehículo na vía pública, salvo cando se trate dunha emerxencia ou accidente.

e) Abandonar animais, vivos ou mortos tanto no lixo domiciliario coma en calquera clase de terreo, sumidoiro, así como enterralos ou inhumalos en propiedade pública.

f) Ensuciar os espazos públicos ou comunitarios, beirarrúas, calzadas, parques e xardíns, etc., con detrito producidos por animais domésticos, quedando obrigados os donos á súa retirada, sen prexuízo da sanción que lles puidese corresponder.

g) Botar calquera tipo de despoxos ou materia orgánica.



h) Acender ou manter acendidas cacharelas, grelladas ou lumes de calquera clase en espazos públicos ou comunitarios, en soares e lugares análogos aos anteriores, así como o aproveitamento e utilización destes.

i) Circular os camións ou vehículos de transporte de sementes, áridos, entullos, materiais de construción, elementos soltos ou mercadorías similares sen a debida protección da mercadoría mediante malla ou sistema similar de cubrición que evite a súa caída á vía pública.

j) Calquera outras actuacións similares ou non que vaian en detrimento da conservación, sanidade, limpeza e ornato públicos.

Sen prexuízo das sancións que procedan, polos Servizos Municipais executaranse as actividades precisas para emendar as perturbacións ocasionadas, pasando o cargo aos seus causantes. Iniciada a execución substitutoria, sen máis formalidades que a comprobación do incumprimento da Ordenanza, a mesma solo se interromperá se o obrigado a iso manifestase a súa intención de realizar de inmediato a prestación incumplida, pasando en tal caso o cargo polas tarefas efectuadas polo Concello ata ese momento.

Artigo 28: *Igualmente queda expresamente prohibido o consumo de bebidas alcohólicas nos espazos públicos cando:*

- a) Poida causar molestias ás persoas que utilizan o espazo público e aos veciños.*
- b) Se faga en envases de cristal ou de lata.*

A prohibición á que se refire este apartado quedará sen efecto nos supostos en que o consumo de bebidas alcohólicas teña lugar en establecementos e outros espazos reservados expresamente para aquela finalidade, como terrazas e veladores, e cando o devandito consumo conte coa oportuna autorización que as autoridades competentes poden outorgar, en casos puntuais.

Queda especialmente prohibido o consumo de bebidas alcohólicas cando poida alterar gravemente a convivencia cidadá. A estes efectos, dita alteración prodúcese cando concorran algunhas das circunstancias seguintes:

- a) Cando, pola morfoloxía ou a natureza do lugar público, o consumo se poida facer de forma masiva por grupos de cidadáns ou cidadás ou convide a aglomeración destes.*
- b) Cando, como resultado da acción do consumo, se poida deteriorar a tranquilidade do ámbito ou provocar nel situacións de insalubridade.*
- c) Cando o consumo se exteriorice en forma denigrante para os viandantes ou demais usuarios dos espazos públicos.*
- d) Cando os lugares nos que se consuma se caractericen pola afluencia de menores ou a presenza de nenos e nenas e adolescentes.*



Os organizadores de calquera acto público de natureza cultural, lúdica, festiva, deportiva ou de calquera outra índole velarán por que non se produzan durante a súa celebración as condutas descritas nos apartados anteriores. Se con motivo de calquera destes actos se realizan aquelas condutas, os seus organizadores comunicaranos inmediatamente aos axentes da autoridade.

Todo recipiente de bebida debe ser depositado nos colectores correspondentes e, no seu caso, nas papeleiras situadas no espazo público. Queda prohibido tirar ao chan ou depositar na vía pública recipientes de bebidas como latas, botellas, vasos, ou calquera outro obxecto.

Artigo 29. - *Queda prohibido sacudir alfombras, tapices, esteiras, sabas e demais roupa de uso doméstico en portas, balcóns e ventás que miren á vía pública. Non poderán regarse as plantas colocadas nos balcóns das vivendas con fachada á vía pública antes das doce da noite e despois das sete da mañá en verán e antes das once da noite e despois das oito da mañá en inverno. Tamén se prohíbe expresamente o tendido de roupa e outros obxectos nas fachadas dos edificios de cara á vía pública.*

A instalación de aparatos de aire acondicionado ou elementos de climatización rexerá polo disposto na normativa de aplicación e no vixente Plan Xeral de Xinzo de Limia. Así mesmo, a instalación de toldos e marquesiñas rexerá tamén polo disposto no Plan Xeral de Ordenación Urbana de Xinzo de Limia.

Artigo 30. - *As macetas e xardineiras dos balcóns e ventás colocaranse de maneira que a súa vertical caia sempre dentro do balcón ou descansen sobre a anchura da ventá e serán suxeitados ou protexidos para evitar que poidan caer á vía pública, en especial en casos de ventos ou chuvia fortes.*

Artigo 31. - *A realización de condutas prohibidas neste capítulo cualificaranse conforme ao que establecen os arts. 139 e ss. da Lei 7/1985 do 2 de abril, sancionándose con multas de 100 a 750 euros as infraccións leves, 751 a 1500 euros as graves, 1501 euros a 3000 euros. No caso de que os infractores sexan menores de idade estarase ao disposto no artigo correspondente da presente ordenanza.*

Capítulo 5º: Uso especial da vía pública

Artigo 32. - *O acceso dos vehículos a inmobles a través da beirarrúa poderá efectuarse mediante badenes ou vaos suxeitos ás normas de construción regulamentarias e debidamente autorizados, previos os informes dos servizos municipais. A autorización para executar este tipo de obras queda sometida ao interese público, polo que quedará sen efecto, e sen dereito a indemnización ningunha, cando o Concello o requira, sendo por conta do beneficiario os gastos precisos para restablecer a beirarrúa ao seu estado normal.*



Para a concesión da autorización será necesario que os edificios ou vivendas onde se sitúen os vehículos conte con licenza de primeira ocupación de ser de recente construción e con licenza de actividade ou instalación polo que respecta a actividades mercantís, industriais, comerciais ou de servizos, na que se comprenda a reserva de espazo para vehículos.

Unha vez concedida a licenza, o interesado adquirirá e colocará, de forma clara, visible e fixa na porta do espazo reservado o sinal identificativo regulamentario e a placa acreditativa da autorización municipal, axustada ao modelo aprobado polo Concello. A Policía Local terá no seu poder un listado actualizado dos titulares de vao e procederá a denunciar aos que usurpen tales espazos reservados, mesmo coa retirada do vehículo infractor.

Será obrigatoria a devolución das placas de vao permanente por parte daqueles titulares que deixasen de aboar a taxa fiscal correspondente ou que fagan un uso desta que non se adecúe á súa finalidade esencial.

Artigo 33. - *As obras necesarias para acondicionar a beirarrúa para facilitar a entrada de vehículos, rebaixe de beirarrúas, colocación de pilonas, morróns e similares, así como para efectuar acometidas de auga e rede de sumidoiros realizaranse sempre por operarios municipais ou por Empresa debidamente autorizada polo Concello, logo de solicitude de interesado, obtención da preceptiva licenza municipal e abono dos custos da obra e das exaccións municipais por parte do interesado así como, se é o caso, logo de constitución de fianza.*

Artigo 34. - *As persoas que incumpran o previsto nos artigos anteriores deste Capítulo serán sancionadas con multas de 751 a 1.500 euros, considerándose como infracción grave.*

Capítulo 6º: Publicidade na vía pública

Artigo 35. - *A publicidade realizada na vía pública axustarase ao disposto na súa Ordenanza específica ou na normativa urbanística e no vixente Plan Xeral de Ordenación Urbana de Xinzo de Limia. En todo caso requirirá previa autorización municipal.*

Capítulo 7º: Ocupación da vía pública con postos ou quioscos e venda ambulante

Artigo 36. - *Toda ocupación da vía pública, sexa de carácter permanente ou temporal, requirirá a previa licenza e o pagamento das taxas establecidas nas Ordenanzas Fiscais.*

Artigo 37. - *A adxudicación de espazos para uso privativo da vía pública con destino á instalación de quioscos fixos de utilización permanente, requirirá a tramitación prevista en*



materia de concesións administrativas sobre o dominio público, ao réxime do cal se acomodará o seu uso, así como ao previsto nas Ordenanzas e Pregos Municipais.

Nos quioscos fixos así como nos postos non permanentes que eventualmente se poidan autorizar na vía pública unicamente estará permitida a venda de prensa e revistas, lambetadas, xeados, doces e bebidas refrescantes. A venda de produtos derivados do tabaco nestes establecementos regularase polo disposto na normativa de aplicación.

A concesión de espazo para actividades privativas na vía pública poderá ser revogada polo Concello cando o considere necesario por calquera motivo, quedando obrigado o concesionario a cesar na actividade e deixar libre e restaurado o espazo ocupado, sen que iso xere dereito a indemnización ningunha.

Artigo 38. - *As ocupacións da vía pública ou espazos de uso público con mesas, cadeiras, carteis publicitarios de calquera tipo, macetas, postos ou outros análogos, precisará autorización municipal, que se outorgará conforme ás disposicións da Ordenanza específica reguladora, fixándose na preceptiva licenza - que deberá colocarse en lugar visible do espazo ocupado - o concreto espazo a ocupación do cal se autoriza con plano incorporado, o prazo de duración da ocupación e o número máximo de elementos a instalar. En ningún caso estas ocupacións suporán dereito adquirido ao seu mantemento, nin poderán dificultar o tránsito de persoas ou vehículos nin causar molestias á veciñanza.*

Baixo ningún concepto se permitirá o uso de aparatos de megafonía ou calquera outros elementos produtores de rúidos ou molestias á veciñanza nas zonas de veladores, cando estes estean situados na vía pública.

As taxas polo establecemento de veladores na vía pública rexeranse polo disposto na Ordenanza Fiscal correspondente.

Artigo 39. - *Queda prohibida a venda directa ambulante, na vía pública ou espazos públicos, de produtos perecedoiros ou bebidas. Así mesmo prohibese a colocación na vía pública de mercadorías procedentes de establecementos autorizados. Esta prohibición esténdese ademais aos elementos para mostrar a mesma ao público, tales como vitrinas, estantes ou similares salvo que se conte coa autorización á que se refire o artigo anterior.*

Baixo ningún concepto se poderá obstaculizar o libre tránsito de peóns e/ou vehículos con elementos de calquera clase colocados na vía pública.

Artigo 40. - *A infracción do disposto neste Capítulo, aparte das demais medidas que procedan, sancionase de acordo coa cualificación que corresponda á infracción cometida, conforme aos límites que establecen os arts. 139 e ss. da Lei 7/1985. As sancións a impoñer serán de 100 a 750 euros en caso de infracción leve, 751 a 1500 euros en caso de infracción grave e 1501 a 3000 euros en caso de infracción moi grave.*



Artigo 41. - Nos supostos recollidos nos artigos anteriores, sen prexuízo da sanción que puidese corresponder, polos Axentes da Policía Local, procederase á retirada dos elementos que causen as infraccións así como ao comiso das mercadorías postas á venda, sen abono de indemnización ningunha. As mercadorías comisadas serán destruídas ou entregadas a establecementos benéficos do Municipio para o seu consumo, logo de comprobación da súa aptitude.

Capítulo 8º: Do tránsito pola vía pública con elementos ofensivos ou perigosos.

Artigo 42. - A circulación pola vía pública portando armas de fogo, armas brancas ou calquera outra arma ofensiva, acomodarse ao disposto nas normas de aplicación.

Artigo 43. - Os que con ocasión de calquera dilixencia policial sexan sorprendidos portando armas de fogo, gas ou aire comprimido ou similares, calquera que sexan os proxectís que utilicen, deberán acreditar estar en posesión da documentación preceptiva e, no seu caso, da pertinente licenza municipal.

A infracción desta norma, será considerada como infracción grave e sancionada con multa de entre 751 a 1500 euros. Ademais, ao infractor seralle retirada a arma, quedando depositada nas dependencias da Policía Local, onde permanecerá durante un período máximo de dous meses dentro do cal o seu propietario poderá recuperala presentando a correspondente licenza e acreditando o pagamento da multa. Transcorrido o mencionado período procederase á destrución da arma intervida.

A utilización de armas ofensivas, calquera que sexa a súa natureza, na vía pública ou espazos públicos, queda terminantemente prohibida e será sancionada como infracción moi grave, salvo cando se xustifique que a mesma se produciu en lexítima defensa e así o ditamenen os Tribunais.

Considerarase infracción grave circular por vía pública portando armas, aínda posuíndo a oportuna autorización, cando estas se leven fóra das súas fundas ou caixas, sancionándose con multa de 1500 euros.

Os que sexan sorprendidas disparando contra especies protexidas serán sancionados conforme se establece na normativa correspondente.

Artigos 44: Queda igualmente prohibido portar mechas acendidas, petardos e toda clase de produtos pirotécnicos que poidan producir ruídos ou incendios salvo que se conte cunha autorización expresa expedida pola Autoridade Municipal. A infracción desta norma, será considerada como infracción grave e sancionada con multa de entre 751 a 1500 euros.

Capítulo 9º: Do uso impropio e indebido da vía pública.



Artigo 45. - *Queda prohibido facer uso da vía pública de maneira que se limite ou impida a súa utilización polo resto dos usuarios, sen a correspondente licenza municipal, agás para a realización de servizos públicos municipais.*

Artigo 46. - *En particular prohíbense as seguintes condutas na vía pública ou espazos públicos:*

a) *Acampar na vía pública. Enténdese por acampar na vía pública a privatización dunha parte desta con instalación de elementos de calquera natureza que denoten aloxamento, ou tendas de campaña, autocaravanas ou caravanas ou vehículos que se usen como residencia temporal ou permanente do seu ocupante.*

b) *Lavarse, bañarse ou introducirse en fontes públicas, estanques ou outros análogos, así como lavar roupa ou aparellos ou utilizar a auga das devanditas instalacións para usos particulares.*

c) *Acceder a espazos reservados en parques e xardíns públicos, ou causar danos nas súas dependencias, mobiliario, servizos ou xardinaría e arboredo, así como en estatuas ou elementos decorativos existentes nestes.*

Así mesmo prohíbese tallar, romper e zarandear as árbores, cortar ramas e follas, gravar ou raspar a súa codia.

Os usuarios dos xardíns e parques do municipio deberán respectar as plantas e as instalacións complementarias, evitar toda clase de danos e sucidades e atender as indicacións contidas nos letreiros e avisos e as que poidan formular os vixilantes dos recintos ou os axentes da Policía Local.

d) *Realizar actividades ou xogos nos espazos públicos que, polas características destes ou do material empregado, poidan molestar aos demais usuarios dos espazos públicos ou causar danos.*

f) *O pastoreo de ovellas, galiñas, cabras, etc.*

g) *Impedir ou dificultar deliberadamente o normal tránsito peonil ou de vehículos polos paseos e polas beirarrúas e calzadas daquelas, salvo que se dispoña da autorización pertinente.*

Artigo 47. - *A realización de condutas prohibidas neste artigo cualificaranse conforme ao que establecen os Arts. 139 e ss. da Lei 7/1985 do 2 de abril, sancionándose con multas de 100 a 750 euros as infraccións leves, 751 a 1500 euros as graves, 1501 euros a 3000 euros.*



Artigo 48. - Considerarase uso indebido da vía pública a ocupación de espazos da mesma con actividades de publicidade ou venda, e en especial o estacionamento permanente ou asiduo de vehículos, particulares ou de empresas, anunciando a súa venda.

Polos axentes da autoridade procederase á localización do infractor e requiriráselle para que cese a súa actividade ou, no seu caso, proceda á retirada do vehículo nun prazo de 24 horas.

Transcorrido o prazo reflectido no apartado anterior, en caso de incumprimento procederase a retirar o vehículo da vía pública e ao seu traslado ao depósito municipal, impoñéndose ao propietario unha multa de 300 euros, sen prexuízo do pagamento das taxas polo servizo da grúa municipal e do depósito do vehículo. Seguirase neste caso o mesmo trámite previsto para o caso de abandono de vehículos.

Capítulo 10º: Dos actos vandálicos no uso do mobiliario urbano.

Artigo 49. - Serán debidamente sancionadas as condutas individuais ou colectivas que impliquen danos, mal uso ou deterioración dos bens que integran o mobiliario urbano.

Artigo 50. - Os organizadores de todo tipo de manifestacións, marchas ou actividades sociais, culturais, deportivas, festivas e análogas na vía pública quedan obrigados a cumprir as normas reguladoras do dereito de manifestación e, no seu caso, a obter previa licenza e dispoñer un servizo de orde.

Os organizadores de actos públicos, culturais, festivos, ou de calquera outra índole, serán responsables de velar polo cumprimento das normas da presente Ordenanza así como do debido respecto e bo uso dos espazos públicos, ao efecto da cal velarán para que non se produzan condutas prohibidas durante a súa celebración e informarán de xeito inmediato á Policía Nacional ou Local no caso de que detectasen algunha vulneración das presentes Ordenanzas.

Artigo 51. - As accións prohibidas nos dous artigos anteriores cualificarán conforme ao que establecen os Arts. 139 e ss. da Lei 7/1985 do 2 de abril, sancionándose con multas de 100 a 750 euros as infraccións leves, 751 a 1500 euros as graves, 1501 euros a 3000 euros.

Capítulo 11º: Dos actos de mendicidade e prestación de determinados servizos na vía pública.

Artigo 52. - Prohíbese expresamente a realización das seguintes actividades:



1. As condutas que, baixo a aparencia de mendicidade ou baixo formas organizadas, representen actitudes coactivas ou de acoso, ou obstaculicen, dificulten ou impidan, con intención ou sen ela, o libre tránsito de persoas e vehículos polos espazos públicos.
2. O ofrecemento de calquera venda ou prestación de servizo a persoas que transiten ou se atopen no interior de vehículos privados ou públicos, tales como a limpeza dos parabrisas dos automóviles detidos nos semáforos ou na vía pública así como o ofrecemento ou venda de calquera obxecto ou mercadoría.
3. A mendicidade, especialmente a exercida por menores ou que se realice, directa ou indirectamente, intervindo menores ou persoas con minusvalideces, sen prexuízo do previsto no artigo 232 de Código Penal.

Artigo 53. - Os actos descritos no apartado 1 do artigo anterior serán cualificados como infracción leve e sancionaranse cunha multa de 100 euros, salvo que poidan ser cualificados como falta grave ou moi grave conforme aos criterios do Art. 140 da Lei 7/1985, do 2 de abril.

Os actos salientados no apartado 2 do artigo anterior terán a consideración de infraccións leves e serán sancionados con multa de 100 euros.

Se a mendicidade é exercida por menores ou minusválidos, a Policía Local comunicará o procedente aos Servizos Sociais do Concello ao obxecto de prestar a axuda que fose posible, sen prexuízo de que se adopte o resto das medidas que prevé, se é o caso, o ordenamento xurídico. Considerarase, en todo caso, infracción moi grave, e será sancionada con multa de 1.501 a 3.000 euros, que se imporá aos pais ou titores dos menores.

Artigo 54. - Será obrigatoria a obtención de licenza de obras antes de executar calquera acto de construción ou edificación, instalación e uso do chan, subsolo e voo, sexa temporal ou permanente, incluíndo a instalación de carteis visibles dende a vía pública e as tallas de masas arbóreas e vexetación arbustiva, así como de árbores illadas. A solicitude e tramitación acomodaranse aos requisitos establecidos nas normas urbanísticas.

A autorización municipal é obrigatoria en todo caso, con independencia de calquera outras autorizacións, licenzas ou permisos que fosen precisos e con independencia da cualificación do chan no que se pretenda actuar.

TÍTULO CUARTO: POLICÍA DA VÍA PÚBLICA, EDIFICIOS, CONSTRUCIÓN E SOARES

Artigo 55. - Será obrigatoria obter a preceptiva licenza municipal para a realización de actividades temporais ou permanentes que comporten a ocupación da vía pública, beirarrúas ou espazos públicos tales como a colocación de caixóns de obras, colectores ou cubas, elementos publicitarios, instalación de aparatos, execución de obras, instalacións de hostalaría, celebración de festas e verbenas, realización de exposicións, demostracións



ou desfiles de calquera tipo e, en xeral, calquera restrición que impida ou dificulte o uso común que lles é propio.

Toda ocupación de vía pública ou espazos públicos debe incorporar a sinalización axeitada diúrna e nocturna; á entrada das vías ou espazos onde se limite ou impida o tráfico, deberán instalarse por conta do interesado indicacións advertindo as restricións e sinalando direccións alternativas.

Queda terminantemente prohibida a colocación de reixas ou prohibicións á circulación viaria sen a previa obtención de licenza municipal, que deberá colocarse en lugar visible da ocupación, especificando data da licenza, duración da ocupación, nome do titular autorizado e, no seu caso, empresa que realiza a obra con indicación da súa dirección e teléfono.

Artigo 56. - *O colector ou cuba que ocupe a vía pública deberá reunir os requisitos de seguridade para a súa situación na vía pública, ocupar un lugar no que non obstaculice a vía pública nin o tránsito de peóns ou vehículos e estar convenientemente sinalizado de maneira que se ocupan parte da calzada deberán protexerse con reixas e sinais de tráfico indicativos da existencia dunha obra.*

Artigo 57. - *Queda expresamente prohibido o peche da vía pública ou espazos públicos para realizar calquera obra, labores de derrubamento, cimentación, verquido de formigón, etc.... sen contar coa correspondente licenza municipal e permiso da Policía Local. Os que necesiten cortar unha rúa para a realización deste tipo de actividades deberán solicitar licenza, que informará preceptivamente a Policía Local, indicando as condicións, día e a hora nos que as anteriores actividades se poderán realizar tendo en conta a menor incidencia do corte no tráfico rodado e peonil.*

Unha vez outorgada a licenza, a Policía Local entregará ao interesado unha licenza, que deberá colocar na reixa que se use para realizar o corte, na que se indicará o nome de titular, os días e as horas autorizados para realizar os cortes de rúas. A mencionada licenza deberá estar visible e a disposición da autoridade que a requira en calquera momento.

Artigo 58. - *A infracción do disposto neste Título sancionarase de acordo coa cualificación que corresponda á infracción cometida, conforme aos límites que preveñen os Arts. 139 e ss. da Lei 7/1985. As sancións a impoñer serán de 100 a 750 euros en caso de infracción leve, 751 a 1500 euros en caso de infracción grave e 1501 a 3000 euros en caso de infracción moi grave.*

Artigo 59. - *A responsabilidade pola infracción dos artigos anteriores recaerá nas seguintes persoas:*

- 1. Persoa física ou xurídica beneficiaria da ocupación ou da actividade.*
- 2. Empresa baixo a responsabilidade da cal xire a mesma.*



3. *Persoal que estea a dirixir ou, no seu caso, realizando a actividade ou a ocupación no momento da denuncia.*

TÍTULO QUINTO: DO PROCEDEMENTO SANCIONADOR

Capítulo 1º: Disposicións xerais

Artigo 60. - *Mediante decreto de Alcaldía poderán desenvolverse os aspectos orgánicos e técnicos que requira a aplicación da Ordenanza.*

Artigo 61. - 1. - *Considéranse infraccións do deber de colaboración que require o cumprimento da presente Ordenanza as seguintes:*

- a) *A negativa ou a resistencia ás tarefas de inspección ou control do Concello.*
- b) *A negativa ou a resistencia a subministrar datos ou facilitar a información requirida polos funcionarios actuantes en cumprimento das súas funcións.*
- c) *Subministrar aos funcionarios actuantes, en cumprimento dos seus labores de inspección, control ou sanción, información ou documentación falsa, inexacta, incompleta ou que induza a erro de xeito explícito ou implícito.*
- d) *O incumprimento das ordes ou os requirimentos específicos formulados polas autoridades municipais ou as súas axentes.*

2. - *Sen prexuízo doutras sancións que puidesen corresponder conforme á lexislación penal e sectorial, as condutas descritas no apartado anterior son constitutivas de infracción grave, que será sancionada con multa de 751 a 1500 euros.*

Artigo 62. - *Elementos probatorios dos axentes da autoridade.*

1. *Nos procedementos sancionadores que se instrúan en aplicación desta Ordenanza, os feitos constatados por axentes da autoridade teñen valor probatorio, de acordo coa normativa aplicable ao efecto, sen prexuízo doutras probas que poidan achegar os interesados.*

2. *Nos expedientes sancionadores que se instrúan, e cos requisitos que correspondan conforme á lexislación vixente, poderanse incorporar imaxes dos feitos denunciados, xa sexa en fotografía, filmación dixital ou outros medios tecnolóxicos, que permitan acreditar os feitos recollidos na denuncia formulada de acordo coa normativa aplicable. En todo caso, a utilización de videocámaras requirirá, se procede, as autorizacións previstas na lexislación aplicable, así como o seu uso de acordo co principio de proporcionalidade.*

Artigo 63. - *As persoas denunciadas non residentes no termo municipal de Xinzo de Limia deberán comunicar e acreditar o axente da autoridade denunciante, aos efectos de notificación, a súa identificación persoal e domicilio habitual, e, se procede, a súa dirección accidental en Xinzo de Limia. Os axentes da autoridade poderán comprobar en todo momento se a dirección proporcionada pola persoa infractora é a correcta.*



No caso de que a identificación do infractor non fose posible ou o domicilio facilitado non fose correcto, os axentes da autoridade procederán á identificación conforme ás normas de aplicación.

Artigo 64. - *Responsabilidade por condutas contrarias á Ordenanza cometidas por menores de idade*

Os pais e nais ou titores e titoras ou gardadores e gardadoras serán responsables civís subsidiarios dos danos producidos polas infraccións cometidas polos menores de idade que dependan deles.

Así mesmo, naqueles casos en que se prevexa expresamente nesta Ordenanza, os pais e nais ou titores e titoras ou gardadores e gardadoras serán tamén responsables directos e solidarios das infraccións cometidas polos menores de idade, sempre que, pola súa banda, conste dolo, culpa ou negligencia, incluída a simple inobservancia.

En todos os casos, e especialmente cando as persoas infractoras sexan menores coa finalidade de protexer os dereitos do neno ou adolescente, o seu desenvolvemento e formación, poderanse substituír as sancións pecuniarias por medidas correctoras, como asistencia a sesións formativas, traballos para a comunidade ou calquera outro tipo de actividade de carácter cívico. Estas medidas adoptaranse de xeito motivado en función do tipo de infracción, e serán proporcionadas á sanción que reciba a conduta infractora. Para este efecto, no caso dos menores solicitarase a opinión dos pais ou nais ou titores ou titoras ou gardadores ou gardadoras, que non será vinculante.

Capítulo 2º: Réxime sancionador

Artigo 65. - *Graduación das sancións*

1. A imposición das sancións previstas nesta Ordenanza guiarase pola aplicación do principio de proporcionalidade e, en todo caso, teranse en conta os criterios de graduación seguintes:

- a) A gravidade da infracción.*
- b) A existencia de intencionalidade.*
- c) A natureza dos prexuízos causados.*
- d) A reincidencia.*
- e) A reiteración.*
- f) A capacidade económica da persoa infractora.*
- g) A natureza dos bens ou produtos ofrecidos no comercio ambulante non autorizado.*

2. Enténdese que hai reincidencia cando se cometeu no prazo dun ano máis dunha infracción desta Ordenanza e foi declarado por resolución firme. Hai reiteración cando a persoa responsable xa foi sancionada por infraccións desta Ordenanza ou cando se están a instruír outros procedementos sancionadores por infraccións desta Ordenanza.



3. Na fixación das sancións de multa terase en conta que, en todo caso, o cumprimento da sanción non resulte máis beneficioso para a persoa infractora que o cumprimento das normas infrinxidas.

Artigo 66. - Responsabilidade das infraccións

No caso de que, unha vez practicadas as dilixencias de investigación oportunas dirixidas a individualizar a persoa ou as persoas infractoras, non sexa posible determinar o grao de participación dos diversos suxeitos que interviñeran na comisión da infracción, a responsabilidade será solidaria.

Artigo 67. - Concorrenza de sancións

1. Incoado un procedemento sancionador por dous ou máis infraccións entre as cales haxa relación de causa a efecto, imporase só a sanción que resulte máis elevada.
2. Cando non se dea a relación de causa a efecto á que se refire o apartado anterior, aos responsables de dúas ou máis infraccións imporánselles as sancións correspondentes a cada unha das infraccións cometidas, salvo que se aprecie identidade de suxeitos, feitos e fundamentos. Neste último suposto aplicarase o réxime que sancione con maior intensidade, gravidade ou severidade a conduta da que se trate.

Artigo 68. - Procedemento sancionador

1. A potestade sancionadora exercerase mediante o procedemento establecido na lexislación do procedemento administrativo.
2. O prazo para resolver o procedemento sancionador será dun ano a contar dende a data da súa iniciación. Transcorrido o prazo máximo para resolver sen que se ditase resolución, producirase a caducidade do procedemento. No suposto de que a infracción non prescribise, deberá iniciarse un novo procedemento sancionador.

Artigo 69. - Prescrición e caducidade

A prescrición e a caducidade rexeranse pola lexislación administrativa sancionadora xeral, sen prexuízo do que dispoña a lexislación sectorial.

Capítulo 3º: Reparación de danos

Artigo 70. - Reparación de danos

1. A imposición das sancións que correspondan polo incumprimento desta Ordenanza non exonera a persoa infractora da obriga de reparar os danos ou prexuízos causados.
2. Aos efectos do establecido no apartado anterior, cando proceda, o Concello tramitará pola vía de execución subsidiaria a obriga de resarcimento que proceda, con cargo ao infractor.

Capítulo 4º: Medidas de policía administrativa

Artigo 71. - Ordes singulares do Alcalde para a aplicación da Ordenanza



- 1. O Alcalde pode ditar as ordes singulares ou nominativas e as disposicións especiais que procedan sobre a conduta na vía pública ou o comportamento cidadán, co fin de facer cumprir a normativa en materia de convivencia cidadá e de civismo.*
- 2. Sen prexuízo da imposición da sanción que no seu caso corresponda, o Alcalde poderá tamén advertir aos infractores das sancións que poidan corresponder en caso de reincidencia.*
- 3. O incumprimento das ordes, as disposicións ou os requirimentos a que se fixo mención nos apartados 1 e 2 deste artigo será sancionado nos termos previstos nesta Ordenanza, sen prexuízo de que se poida presentar denuncia penal por desobediencia.*

DISPOSICIÓN ADICIONAL

- 1. O establecido nesta ordenanza non impedirá a aplicación do réxime sancionador previsto nas disposicións sectoriais que cualifiquen como infracción as accións ou omisións contempladas nesta.*
- 2. En todo caso non poderán ser sancionados os feitos que fosen sancionados penal ou administrativamente nos casos en que se aprecie identidade de suxeito, feito e fundamento.*

DISPOSICIÓN DERROGATORIA

Primeira. - *Queda derogada toda disposición naquilo que se opoña ou contradiga á presente Ordenanza.*

DISPOSICIÓN FINAIS

Primeira. - Difusión da Ordenanza

1. -Unha vez aprobada definitivamente esta Ordenanza, publicarase integramente en forma regulamentaria. O Concello poderá realizar unha a súa edición para a súa distribución directa á veciñanza.

Segunda. - Aplicación da presente ordenanza

As normas contidas na presente ordenanza aplicaranse:

- a) Por analogía, naqueles supostos que non se atopen expresamente regulados e que, pola súa natureza, estean comprendidos dentro do seu contido.*
- b) Supletoriamente, respecto ao establecido en normas sectoriais aplicables, xa sexa estatais, autonómicas ou locais.*

Terceira. - Entrada en vigor

Esta Ordenanza entrará en vigor aos quince días hábiles a partir da súa publicación no Boletín Oficial da Provincia de Ourense.”



CONCELLO DE XINZO DE LÍMIA (Ourense)

Código Postal 32630 - Tel. 988 55 01 11 - Fax. 988 55 01 12 - C.I.F. P 3203300 C